

河間府新志卷之十七

典文志

述德

世言漢武表彰六經而河間獻王實爲功首三代以下宗藩貴者必稱河間東平兩獻王顧東平卽有爲善之樂恭儉之美孰若河間尚學好古道德隆駿哉舊封千年郡邑以光其餘載記宜有獨尊舊志猥以封建列之可爲不知所裁者也今特舉以冠典文而名其篇曰述德以曾孫惠王良東漢孝王開河間宗室輔附云

河間獻王德漢孝景皇帝子也以景帝前二年立修
學好古從民間得善書必爲好寫與之留其真者
加賜金留以招之由是四方道術之人不遠千里
或有先祖舊書多以奉獻王者故得書多與漢朝
等是時淮南王安亦好書所得多浮辨獻王所得
皆古文先秦舊書周官尚書禮記孟子老子之屬
皆經傳說記七十子之徒所論其學舉六藝立毛
氏詩左氏春秋博士修禮樂被服儒術造次必於
儒者武帝時獻王來朝對三雍宮及詔策所問三
十餘事其對推道術而言得事之中文約旨明立

二十六年薨中尉常麗以聞曰王身端行治溫仁
恭儉篤敬愛下明知深察惠於鰥寡大行令奏諡
法曰聰明睿知曰獻宜諡曰獻王子共王嗣傳剛
王頃王孝王成帝建始元年立獻王曾孫上郡庫
令良爲河間王是爲惠王良能修獻王之行母太
后薨服喪如禮哀帝下詔褒揚曰河間王良喪太
后三年爲宗室儀表其益封萬戶河間自獻王至
王尚傳八世一百六十年獻王子封侯者十五人
孫封侯者七人襲侯者三十六人獻王與毛生等
共采周官及諸子言樂事者以作樂記其內史丞

王定傳之以受常山王禹禹成帝時爲謁者數言
其義獻二十四卷又取考工記以補冬官之缺初
魯人大毛公爲詩詁訓傳於其家禮古經出於淹
中獻王得而獻之河間人顏芝得孝經藏之其子
貞以獻於王今十八章是也其所述者又有河間
周制一十八篇河間獻王對三雍宮三篇毛公之
學自謂子夏所傳河間王好之以毛萇爲博士
東漢河間孝王開章帝子也永元二年封分樂成
渤海涿郡爲國延平元年就國奉遵法度吏人敬
愛之

劉輔漢河間宗室也舉孝廉爲襄贲令上書言得失
召見上美其材擢爲諫議大夫會成帝欲立趙婕
妤爲皇后先下詔封婕妤父臨爲列侯輔上書言
臣聞天之所與必先賜以符瑞天之所違必先降
以災變此神明之徵應自然之占驗也昔武王周
公承順天地以饗魚鳥之瑞然且君臣祇懼動色
相戒況乎季世不蒙繼嗣之福屢受威怒之異者
乎雖夙夜自責改過易行畏天命念祖業妙選有
德之世考卜窈窕之女以承祖廟順神祇心塞天
下望子孫之祥猶恐晚暮今廼觸情縱欲傾意卑

賤之女欲以母儀天下不畏於天不媿於人惑莫大焉里語曰腐木不可以爲柱卑人不可以爲主天人之所不予必有禍而無福市道皆共知之朝廷莫肯一言臣竊傷心自念得以同姓拔擢尸祿不忠污辱諫諍之官不敢不盡死惟陛下深察上使侍御史收縛輔繫掖庭秘獄羣臣莫知其故於是中朝左將軍辛慶忌右將軍廉褒光祿勳師丹大中大夫谷永俱上書曰臣聞明主垂寬容之聽崇諫諍之官廣開忠直之路不罪狂狷之言然後百僚在位竭忠盡謀不懼後患朝廷無諂諛之士

元首無失道之愆竊見諫大夫劉輔前以縣令求
見擢爲諫大夫此其言必有卓然切至當聖心者
故得拔至於此旬日之間收下秘獄臣等以爲輔
幸得託公族之親在諫臣之列新從下土來未知
朝廷體獨觸忌諱不足深過小罪宜隱忍而已如
有大惡宜暴治理官與衆共之昔趙簡子殺其大
夫鳴犢孔子臨河而還今天心未豫災異屢降水
旱迭臻方當隆寬廣聞褒直盡下之時也而行際
急之誅於諫諍之臣震驚羣下失忠直心假令輔
不坐直言所坐不著天下不可戶曉同姓近臣本

以言顯其於治親養忠之義誠不宜幽禁於掖庭
獄公卿以下見陛下進用輔亟而折傷之暴人有
懼心精銳銷喪莫敢盡節正言非所以昭有虞之
聽廣德美之風也臣等竊深傷之唯陛下留神省
察上廼徙繫輔法官獄減死罪一等論爲鬼薪終
於家

外紀

人與地繫而有其別焉於是爲外紀

漢孝文帝竇皇后景帝母也呂太后時以良家子選入宮太后出宮人賜諸王各五人竇姬與在行中家在清河願如趙近家請其主遣宦者吏必我置籍趙伍中宦者誤置代籍竇姬涕泣不欲往相強乃肯行至代代王獨幸竇姬生景帝文帝立數月公卿請立太子而竇姬男最長立爲太子姬爲皇后竇皇后親蚤卒葬觀津於是薄太后乃詔有司追封后父爲安成侯母曰安成夫人置園邑二百

家長丞奉守比靈文園法后兄長君弟廣國年四五歲時家貧爲人畧賣其家不知處傳十餘家至宜陽爲其主人入山作炭暮卧岸下百餘人岸崩盡厭殺卧者少君獨脫不死自卜數日當爲侯從其家之長安聞皇后新立家觀津廣國去時雖少識其縣名及姓又常與姊采桑墮用爲符信上書自陳皇后言帝召見問之具言其故曰姊去我西時訣傳舍中丐沐沐我已飯我乃去於是竇皇后持之而泣侍御左右皆助人主悲哀乃厚賜之家於長安文帝崩景帝立皇后爲皇太后竇氏侯者

凡三人竇太后好皇帝老子言太后後景帝六年
凡立五十九年元光六年崩合葬霸陵

舊志竇太后下泛述竇嬰梁孝王事殊無記法
今一依漢書外戚傳書之

孝武鈞弋趙婕妤好昭帝母也家在河間武帝巡狩道
河間望氣者言此有奇女天子亟使使召之既至
女兩手皆拳上自披之手即時伸由是得幸號曰
拳夫人拳夫人進爲婕妤居鈞弋宮大有寵元始
三年生昭帝號鈞弋子任身十四月乃生上曰昔
堯十四月而生今鈞弋亦然乃命其所生門曰堯

母鈞弋婕妤好從幸甘泉有過見譴以憂死因葬雲
陽昭帝卽位追尊爲皇太后發卒二萬人起雲陵
邑三千戶漢武故事婕妤旣殯香聞十里上疑非
常人發棺無屍衣履存焉列仙傳曰帝披夫人手
得一玉鈞故以鈞弋號焉夫人國色帝甚愛之雲
陽宮記云武帝思鈞弋夫人爲起集靈臺於甘泉
常有一青鳥集其上至宣帝乃止

靈帝母孝仁皇后董氏河間人爲解犢亭侯長夫人
建寧元年帝卽位追尊長爲孝仁皇陵曰慎陵以
后爲慎園貴人明年使中常使迎貴人到京師上

尊號曰孝仁皇后宮稱永樂太后使帝賣官求貨
自納金錢盈滿堂室及靈帝崩何太后臨朝何進
與三公奏孝仁皇后使故中常侍夏惲永樂太僕
封諶等交通州郡辜較在所珍寶賂悉入西省
藩后故事不得留京師請永樂太后遷宮還本國
后崩喪還河間合葬慎陵廟曰英廟皆置令丞

北魏文昭皇后高氏穆人司徒高肇女也幼時常夢
立堂內日光自窓中照之灼然甚熱后東西避之
光隨照不已如是數日心異之以問其父父以問
閔宗宗曰此奇徵也公女當被帝命誕育人君之

新唐書卷一百一十一
十一
象後被選入宮事文成帝生宣武帝卒謚文昭貴
人宣武卽位始上尊號

明昭順麗妃張氏憲宗東宮時妃也其先世張泰泰
祖恭仕元爲保定宣撫司達魯花赤泰生而長偉
有子七人並壯勇元之末世聚衆於西峯寨明初
元帥徐達兵至因以所部歸焉有功御劄慰勞賜
金緞牛酒及其子嵩岩皆授保定右衛指揮使得
世襲後遷大同中衛世襲指揮僉事遂家於河間
四世孫輔天順中扈從北征遇土木之變以身衛
上矢盡力竭遂歿於陣封奉國將軍妃爲泰五世

女孫生公主一人其尚之者駙馬都尉林氏明世
后妃出河間者凡二人其一爲孝宗孝康皇后張
氏家興縣

紀事

郡所有事紀以待考畧備於古今

春秋

魯昭公六年冬齊侯伐北燕七年春王正月暨燕平
左傳六年十二月齊侯伐北燕將納簡公七年正
月癸巳齊侯次於號燕人行成二月戊午盟於濡
上杜征南注云濡水出高陽縣東北至河間鄭縣
入易水

按孔穎達云今高陽無此水不知杜何據而云
然今以水經注求之濡水出固安縣窮獨山至